

ANNABI ILIASU



The history of the prophet Elijah in Shanga as recorded in the books of the prophets: 1 Kings 16:29 to 19:21 and 2 Kings 1-2.

Kiina lalahu mahεεbo

Isra'ilaã kii Ahabu

Yahudaã kii Asa kiikeyē kadoo wokoi wɔɔwɔ wo'aazo bii di Ɖmeli ni Ahabu gɔ̃ Isra'ilaã kii, ì kiikè Samalia yē kadoo wohwaazo. Yáa tá Baanaje ba yaajia ibe kè ì dà gbãiala tá dì ì εε kɔ̃n. Gɔ̃ɔna Neba ni Yeloboamu asozεzεkεãzo tà kè'in hokanda, di ì Shidɔ̃ gbãia kii Ɛtebaali nene Jezabeli shì ne, di ì hwaashì zɔkεzo Baalin, ita ì shishi. Ì ke bò Baali ben Samalia, di ì ì sangakεgu kihe ke beũ. Ì Ashetaati ago kìheũ mɔɔ, ì ladì ì Baanaje Isra'ilaã Lakii zũu hwà ì dà Isra'ilaã kiinala tá dì ì εε kɔ̃n.

Ahabu lokaci di Beteli gbān Hieli Yaliko kpākṗā ibe jè. Tá ì ì bika hwaashì, di ì ni nɔgɔ̃ni mahεεbo Abilamu gà. Tá ì ì kpale tatabonia kìhe, di ì ni kpεεbo Shegubu gà, lata Baanaje hè Nuni ni Jɔshuan ibe hè.

Kɔkɔndaã annabi Iliasu toona

Annabi Iliasu tá bò Tishebe Gileada tεēũ, ibe hè kii Ahabun ì kè: Baanaje Isra'ilaã Lakii tozo tá mabi zɔkεa'in, tun yē dii hii ba kpaada, wàba laabãada. Sai dii tá maa hè.

Di Baanaje yāahè Iliasun ì kè: Ì kpatée n̄ wee usasala kawa, n̄ dudu Keliti òo dɔguũ Yuudā kawa dabia, n̄ òo be imi. Maa jè kɔkɔndaān à n̄ too gube. Di ì wèe ibe kè lata Baanaje hèn'in, ì bee Keliti òo dɔguũ Yuudā kawa dabia. Kɔkɔndaā n̄ in ihokazo s̄wzo saazo egeezo, di ì òo be imi.

Zalipata nesɔkɔ Iliasu toona

Diihwaa kpée òo be i gegeekè, dun wàbai laabāa tée beūa. Di Baanaje yāahè'in ì kè: Ì kpatée n̄ wee Zalipata lée Shidō sɔ, ngō bee gube. Maa jè nesɔkɔ nindenajen ì n̄ too gube. Di ì kpàtee ibi wada Zalipata. Tá ì bòo hwaa be leekpɛema, ì nesɔkɔ kee tà, ibi ago cegābo gudɛa gube. Di Iliasu leezù nesɔkɔ beji ì kè: Ì wee n̄ numɛe izo, ko mɔkō, mà mi. Tá ibi wada kashiji, Iliasu ladì ì leezù'iji ì kè: Ì numɛe ihoka kasozo mɔɔ. Di neneni be kè'in: Baanaje n̄ Lakii tozo, ko kpanjicē mába zoa, sai wucici ookutu doo hēũ yō mɔkōnizo tɔɔ. Ì ago cegābo mabi gudɛa guii, sa'ai má wada kpée mà mabena kezo wà bee ma nizo, sa'ai wá ga dāa. Di Iliasu kè'in: M̄ba wasaamaa. Ì wee n̄ kè lata nn hē, amaa n̄ kpanjicē kezo mɔkō n̄ nuzomɛe tōɔ, sa'ai n̄ n̄ bo kea, miia n̄ nizo. Dun Baanaje Isra'ilaā Lakii kè, wucici ba yāa heūa, mɔɔ yō ba yāa tɔ beūa ha lokaci tá ì toa laabā tɛema. Nesɔkɔ be wèe ibe kè lata Iliasu hèn'in, di àbi hobeeda lee ha dii dake, īa ì baa gbāiazo Iliasuzo. Wucici tà yā hē beūa, yō tà yā tɔ beūa, lata Baanaje dà Iliasun ibe hē.

Bee kpɛɛ nɛnɛni kenaje be ni be bi geedɛa. Tá gee be gbadakũ gbagba, di ni be gà. Di nɛnɛni be hɛ Iliasun: Lakii gbace, bu di ì wa kashikɔ̃, di n nù ma bà? N nù dun Lakii bobo ma asoɛɛɛɛɛ, ì ma ni dɛ ya? Di Iliasu kɛ'in: Ì n ni be kpamama. Di ì ni be shì nɛnɛni be ooũ, ì shì'a'izo kedadakɔ̃la kegũboũ tá ì intɛɛ. Ì ì intɛɛ ì intɛɛboma gube, di ì ò Baanajema ì kɛ: Baanaje ma Lakii, nɛsɔkɔ tá ma intɛɛ ì bà, miia di nn tò ì ni gà, n zũushi kpà'iji ya? Di ì shĩnle kaka nàna ninɔgɔ̃ni bema kù àa, ì ò Baanajen ì kɛ: Baanaje ma Lakii, n to ì beteke ladi ì shi ì jiiũ. Baanaje Iliasu o mà, di beteke ladi ì shì ni be jiiũ, ì kpàtɛɛ. Tá Iliasu ninɔgɔ̃ni be shì ì intɛɛ'izo, di ì gǎ'izo keũ, di ì ì kpà ì dɔ̃ma ì kɛ: Ì wa, n ni betekɛzo! Di nɛnɛni be hɛ Iliasun: Maa dɔ̃ tandi miia Lakii gbacen. Baanaje yǎa tá bò n leeũ intenn.

Iliasu Obadiazo

Iliasu diihwaakè gube. Ì yɛɛ aabɔ̃aboũ Baanaje yǎahè'in ì kɛ: Ì wee n n ginde mɔ̃ Ahabun, má toa laabǎ ì tɛɛũ. Di Iliasu kpàtɛɛ ibi wada ì ì ginde mɔ̃ji Ahabun.

Laabǎa kĩn ì kɛ zɛɛ Samalia, di Ahabu ì bà gbǎnkɛpasa Obadia shìshi. Obadia kĩn ita ɛɛɔ̃ Baanajen gbagba. Lokaci tá Jezabeli bi Baanaje annabiǎ dɛdɛa, Obadia ì à hàkɔ̃ gbǎn kasɔɔ, ì à dùdu gbɛekoonaũ gbǎn kahwaa wokoikoi, di ì à tòo mabenazo izo. Di Ahabu hɛ Obadian: Wà tata tɛɛũ wà wee isɔ̃ɔna gu òo dɔ̃guǎzo kɔ̃n. Wàbata dɔ̃ in wá shɛɛ taa dun wà wa busuǎ wa alwhadaliǎzo toozo. Di à tɛɛ gbii kɔ̃ji, à koji ì zɛɛ shì. Tá

Obadia kōtā Iliasuzo zεema, ì ì dǒ, di ì ìntee ì gbεema ì kè: Ma baanaje Iliasu, miia guben ya? Iliasu jinshì'in ì kè: Maan! Ìn wee ì he n baanajen ma shì. Di Obadia kè: Tɔɔ kee kpashe maa kè, di mbi maa n zɔɔkɛda daa Ahabu ooũ dun ì ma dε? Baanaje n Lakii tozo boii kee ko tεe kee ba beeda tá ma baanaje gè gbāia jījī'àma dun à n gude. In wà kè mba bee gubea, ì kè à jiidà. Di mbi heameε tandi mà wee mà he ma baanaje Ahabun n shì ya? In ma gǎgǎ zεema, mába dǒa gu tá Baanaje Tǎa ì n shia ì wee'nzoa. In ma wèe maa hε Ahabun, in ìta n wàa, ì ma dεa. Maa n zɔɔkɛda kīn ma εzǒ Baanajen tun ma jingekɛdii. Ma baanaje Iliasu, tá Jezabeli bi Baanaje annabiā dɛdɛa, ho tá maa kè ntà maaa? Maa di à gbānkāa hàkō gbān kasɔɔ, ma à dùdu gbεekoonaũ gbān kahwaa wokoikoi, ma à tòo mabenazo izo. Di mbi heameε tandi mà wee mà he ma baanaje Ahabun n shì ya? Ì ma dεa. Di Iliasu kè: Baanaje Jē'eekɛda tá mabi zɔɔkɛa'in tozo má wada dun ì ma wa kpāia.

Iliasu jiinaazo kōtāā Kaameli kasama

Di Obadia wèe ì kōtā Ahabuzo, ì yǎa be hē'in, di Ahabu wèe kōtajì Iliasuzo. Tá Ahabu Iliasu wà, ì kē'in: Isra'ilaā tεɛdɛda, miia guben ya? Di Iliasu kè: Baa maa ma Isra'ila tεe dēa, miia n je baa gbāiazo, āa di āa dē, dun a togokè Baanaje yāajeāzo, a dō Baalima. Ìn Isra'ilaā shishi kōn tandi à hakōmaji Kaameli kasama lɛdole Baali jiinaazo gbān koi hwaa nizo kahwaa

wokoi Ashetaati jiinaazo gbān koi hwaa tá àta hobee Jezabelizo.

Ahabu Isra'ilaā shìshi kōn, di ì jiinaa be hàkō Kaameli kasama. Di Iliasu nù kutu Isra'ilaā gu ì à làla ì kè: Ágōa bee zūuhwaazo ha busaa? In Baanaje Lakiin, à dō'ima. In Baalin kīn, à dō'ima. Àta hokan jinshi'inda, di Iliasu hē'ēē: Baanaje annabiā bii maa di ma gō ma do. Baali jiinaa kīn anun gbān koi hwaa nizo kahwaa wokoin. À diisaa kpawama hwaa, jiinaa be a ì dooni shi à zēēzēē à kaa ago cegāboma, àba cegāmaa. Maakīn má ì dooni kpākpāa, mà kaa ago cegāboma, mába cegāma kīnda. Anunkīn à Baali shishi, maakīn má Baanaje shishia. À gbace tá wa yāa shì ì cegāma ĩa Lakiin. Di koji kè: Ì yāazo! Di Iliasu hē jiinaa ben: À diisaa doo shi à kpākpā mahēē, dun áa di dake. À a jii shishi, amaa àba cegāmaa. Di diisaa tá wàa kpà'ama abe shì abe kpākpā, di àbi Baali shishia tun saazo ha usō wèè ì bòo gudoodoobii. Àbi bee'oa, àbi lokocia sangakēguji tá abe bò, àbi kēa: Baali, wa yāa shi! Amaa àta hokan maa, ìta à yāa shia. Tá usō bòo gudoodoobii, di Iliasu bi kūkekēa'azo ì kè: À leezu gbada, ĩa baanaje ya, ko ba leendaa? Ì bēē bee gukeēū ko, áa dō ya? Ì wèè sutagu ya? Ì tàji ya? Ibi ii'oa, di ábi ì lakpatēda ya? Di àbi oa leeū gbadazo, àbi à ginde zēēzēēda hēesaazo shingezo lata àta kē, ha āma bi baashia à jìima. Tá usō jìgo, di àbi yāabutēda ha igeē sangakēdii bòo. Amaa ìta hokan jinshì'ēēda, ìta à yāamaa, ìta tōlale'ēēda.

Di Iliasu hɛ gbāian: À nu ma gu! Tá à zǝ'iji kǝn, di Baanaje sangakɛgu tá wàa wii ibe kpǝkpǝ ibi boa. Ì gbɛɛ shì wokoi wohwaazo Yakubu boiina dake leekpɛɛ. Yakubu Baanaje yǎahɛ'in yǎa ì kɛ, wà he'in tandi Isra'ila. Tá ì Baanaje sangakɛgu be bò, di ì gu'ɛɛ ɛɛ ì lòkociji. Gu'ɛɛ be bòò ì í shi lita wokoi wɔsɔɔzo. Ì ago kàa sangakɛgu bema, ì dìi be zɛɛzɛɛ ì kàa ago bema ì kɛ: À itɔtɔ luguda shii, à kaa sangakɛbo bema ago bezo. Tá abe tɔtɔ, di ì kɛ: À ladi à tɔtɔ mɔɔ. Tá abe tɔtɔ, di ì kɛ: À ladi à tɔtɔ ì kɛ kù àa. Di abe tɔtɔ ha kù àa. Í be baashì ì lòkoci sangakɛgu beji ha gu'ɛɛ be hwà. Igee sangakɛdii annabi Iliasu zǝji ì kɛ: Baanaje, Ibrahĩ Ishiakazo Isra'ilazo Lakii, n̄ to wà dǝ kpǝia tá nn Isra'ilaã Lakiin, mɔɔ maa n zɔɔkɛdan, mabi ho dii kɛa, dun miia di nn hɛmɛɛ. N̄ ma yǎa ma Baanaje! N̄ ma yǎa ma, dun gbāia be dǝ miia Baanaje nn Lakiin, mɔɔ mbi à zũusɔdia, dun à sɔdi à shi'mma. Di Baanaje ce sòò sangakɛboma agozo gbɛɛnazo tɛɛ bezo, à wǎ, di í be tá bee gu'ɛɛũ gegeekɛ. Tá gbāia wà, à ìntɛɛ à gbɛɛma à kɛ: Baanaje Lakiin! Baanaje Lakiin! Di Iliasu kɛ'ɛɛ: À Baali jiinaa kũkũ, à gbānkan ba hɛ'amaa. Tá à à kũkũ, di Iliasu wɛɛ'azo Kisɔ gu'intɛɛnaũ, ì à dɛdɛ gube.

Iliasu hɛ Ahabun: N̄ wee n̄ hobeɛ, n̄ imi, dun ma laa jĩn mà. Di Ahabu wɛɛ ibi hobeɛda, ibi imia. Di Iliasu shia ì wɛɛ Kaameli miima, ì sùta ì mii gǎ ì kũsũ zǎaũ. Ibe hɛ ì jĩlkɛdan: N̄ wee n̄ guwa tekɛ kawa. Di ì wɛɛ ì wadò. Tá ì shì, ì kɛ: Hokan ba bee gubea. Di Iliasu kɛ'in ì ladi ì wee wadɔji mɔɔ, di ì wɛɛ lee ha kù

sɔbodoo. Kù sɔhiabɔ́abo di j̄iikɛda be kè: Ma gigije wà mɔkɔ́ doo ootātāzo, ibi kpàtɛɛda tekũ. Di Iliasu kè'in: Ñ wee ñ he Ahabun ì ì busu guda ee busuān, ì gāu ì intɛ kasama daaji laa ì lɛ. Laa bi shikea busābusā, ututu zɛzɛ kpàtɛɛ, di laa sòo gbada. Ahabu bee busu gudaũ, ibi wada Jɛzɛlɛɛli. Baanaje gbada shìà Iliasuma, di ì ì tɔgɔ hàkɔ ibe kũ, ì baashì ì dì ɛɛ Ahabun ha ì bòo Jɛzɛlɛɛli.

Baanaje bo nua Iliasuma Holɛbu

Ho tá Iliasu kè Ahabu ladì Jezabelin kɔ́n, lata ì jiinaa be dèdɛ hɛ́ɛsaazo kɔ́n, di Jezabeli lakpalekè Iliasun ì kè: Daaji lahũ leena, in matà kemii lata nn kè jiinaanda, jiina j̄iizezekemɛɛ gbagba! Di wasaa Iliasu kũ, di ì kpàtɛɛ ì baashì ì ì ginde miibogu gudè. Tá ì bòo Bɛesheba, Yahuda tɛɛũ, gube ì ì j̄iikɛda be tò, di ì tà gumasamaũ dii doo. Ì wèè ì zùtɛ kpāngo ago hĩ, di ì zèè dun ì ga ì kè: Baanaje, bee bòomazo. Ñ ma beteke shi tanditandi, dun mába daa ma cĩinalaa. Di ì intɛ ibi ia kpāngo ago be hĩ.

Mala'ika nù gube, ì oonà'ima ì kè: Ñ kpàtɛɛ ñ hobee. Tá Iliasu gu wà, di ì kpanjicɛ ɛena wà itɔɔzo jeã ì mii gu. Di ì hobèè ì imì ì ladì ì intɛ. Baanaje Mala'ika ladì ì nù kù hwaa, ì oonà'ima ì kè: Ñ kpàtɛɛ ñ hobee, dun ta saa mbi wada keji. Di ì kpàtɛɛ ì hobèè ì imì. Mabena be tò ì gbadatà, di ì tà dii kahwaa usɔɔbii gũmɔzo ha ì bòo Lakii kasa gu tá wàta ke Holɛbu. Tá ì gǎ ibi ia kasa be gu'ɛɛũ, guben Baanaje yāahè'in ì kè: Iliasu, bu mbi kɛa

guii? Ì jinshì'in ì kè: Baanaje Lakii Jě'eekeda, ma màma gbagba n yāaji, dun Isra'ilaā togokè n i tá bee'àzo yāaji, di à n sangakeguā wii à n annabiā dèdè hēesaazo. Maa di gǝ ma do, di àbi ma tobekea tandi. Di Baanaje kè: Ñ bo ñ wee ñ gǝ ma ɛ kasama dabi, má gǝā n ɛ.

Ututu gbada kpàtɛɛ, ibi kasaā be payaa, ibi gbɛɛ gbagbaana wiiwiida Baanaje ɛɛ, amaa Baanaje ba bee ututu beūa. Ututu be kpɛɛ tɛɛ lùgbegbe, amaa Baanaje ba bee tɛɛ lugbegbe beūa. Tɛɛ lugbegbe be kpɛɛ tandi cen, amaa Baanaje ba bee ce beūa. Ce be kpɛɛ yāahe mǝkōni busābusā. Tá Iliasu yāa be mà, ì ì tǝgǝ tàta ì wiema, di ì bò ì wèè ì gǝ gbɛekoo be kpalema, ibe mà wàa hè'in: Iliasu, bu mbi kea guii? Ì jinshì'in ì kè: Baanaje Lakii Jě'eekeda, ma màma gbagba n yāaji, dun Isra'ilaā togokè n i tá bee'àzo yāaji, di à n sangakeguā wii à n annabiā dèdè hēesaazo. Maa di gǝ ma do, di àbi ma tobekea tandi. Di Baanaje kè'in: Ñ sǝdi ñ wee Damasaku gumasamaū. In n nù gube, ñ Azaeli je Suliaā kii, ñ Nimishi cīini Yehu je Isra'ilaā kii, ñ Abeli Mehola gbace Safata ni Elisha je n gǝɛ annabi. Gbace tá bò Azaeli hēesaa leekpɛɛma, Yehu di à dɛdɛa. In à bò Yehu hēesaa leekpɛɛma kīn, Elisha di ì à dɛdɛa. Amaa ma Isra'ilaā zǝ gbān dubu sǝhia (,). À gbānkan tà kutɛ Baalin ì leekpà'ima.

Iliasu Elisha shishiā

Di Iliasu kpàtɛɛ ì bò gube, ì wèè ì Safata ni Elisha tà, ibi jeekuuda diinazo ì gbāiāzo samahwa wokoi wohwaazo. Īa di

dò kpɛɛzo. Di Iliasu zǝ'iji, ì ì tɔgɔ zù'ila. Di Elisha ì diina tò gube, ì baashì ì bò ì dò Iliasuma, di ì kè'in: Ñ to mà wee mà saidiikeeke ma jen ma dɔzo tǝɔ, má nua mà dɔ'mma tandi. Iliasu kè: Wee ñ sɔdi ñ shi. Ho tá maa kèmiì nn dǝ. Di Elisha ladì ì ì diina be lɔkɔ zǝɛ, ì ce lakù dii kotogaanazo, di ì diina be sɔɔ hiihii ibe kpà gbāiama abe sò. Di ì bò ì dò Iliasuma, ì gǝ ì oodanaje.

Kiina lalahu hwaabɔabo

Iliasu kii Ahaziazɔ

Ahabu ga kpɛɛ Mɔabuā à ginde shì Isra'ilaāma. Lokaci tá Ahazia sòo tun kedadakɔla taagaũ Samalia, ibi geedɛa. Di ì gbāia jǝ ì kè: À wee Ekeloni jii Baalizebu lalajimɛɛ, in ma ɛa gee diizo. Di Baanaje Mala'ika hè Tishebe gbace Iliasun: Ñ kpatɛɛ ñ wee kɔtaji Samalia kii jǝniazo, ñ à lala, Lakii ba bee Isra'ilaā tɛɛũaa, di àbi wada yāalalaji Ekeloni jii Baalizebuma? Īa yāaji ma kè Ahazia ba kpatɛɛda intɛɛboma tá ì intɛɛmaa, ì gaa. Di Iliasu wèe ibe kè lee.

Tá jǝnia be sɔdì à wèe kii gu, di ì à làla ì kè: Budikpaaji a sɔdì a shì? Di à jinshì'in à kè: Nɔgɔni kee di nù ì kɔtawazo, ibe hèwɛɛ wà sɔdi wà shi, wà hemii, Baanaje kè n gbāia jǝ yāalalaji Ekeloni jii Baalizebuma, dun iba bee Isra'ila tɛɛũaa? Īa yāaji

ńba kpateɛda intɛɛboma tá n òntɛɛmaa, ń gaa. Di kii à làlà ò kè: Nɔgɔni be tá nù ò kɔtá'izo ibe yāahè'ɛɛ la di ò ii? À jinshì'in à kè: Hokaka tɔgɔ nɔgɔni be gǎ, mɔɔ ò shèe bɛɛ èe. Di kii kè: Īa Tishɛbe gbace Iliasun.

Kii ò jɛɛnaa gbǎn kahwaa wokoi à ɛkɛdazo jì Iliasu kǔji, di à wèe à ò tà zutɛɛde kasama. ɛkɛda be kè'in: Lakii gbace, kii kè ò intɛɛ! Iliasu jinshì'in ò kè: In maa Lakii gbacen, ce bo laaũ, ò n wǎ n jɛɛnaazo gbǎn kahwaa wokoi. Di ce bò laaũ, ò à wǎ kɔn. Di kii ladì ò jɛɛnaa gbǎn kahwaa wokoi kǎa jì à ɛkɛdazo mɔɔ. ɛkɛda be kè: Lakii gbace, kii kè ò intɛɛ hidahida! Iliasu kè'in: In maa Lakii gbacen, ce bo laaũ, ò n wǎ n jɛɛnaazo gbǎn kahwaa wokoi. Di Lakii ce zùga, ò à wǎ kɔn. Di kii jɛɛnaa gbǎn kahwaa wokoi kǎa jì à ɛkɛdazo kù aabɔabo. ɛkɛda be wèe ò kùtɛɛ Iliasun ò gaahwaakè'in ò kè: Lakii gbace, maa n zɔɔkenaa diinazo gbǎn kahwaa wokoi, ò wa betɛke daaja wa. Ce bò laaũ ò kù ɛkenaa hwaa mahɛɛnama à jɛɛkenaa kɔn. Tandì kìn ò ma betɛke daaja wa. Di Baanaje Mala'ika hɛ Iliasun: Ò intɛɛ ò wee'izo, mba ò wasaamaa. Di ò intɛɛ, à wèe kii be gu lɛdole. Di Iliasu kè kii ben: Baanaje kè iba bee Isra'ila tɛɛũaa, di n gbǎia jì yāalalaji Ekeloni jii Baalizebuma? Īadikpaaji ńba kpateɛda intɛɛboma tá n òntɛɛmaa, ń gaa. Di kii Ahazia gà lata Baanaje hɛ Iliasun ò kè.

Yahudaĩ kii Yeholamu, Yehosafata ni kiikeyɛ hwaabɔabo di Yolamu zùtɛɛ Ahazia gɛɛ, dun Ahazia ba ninɔgɔnia zoa. Ahazia labaii kǎa bee Isra'ilaĩ kiina lalahu gbaũ.

Baanaje Iliasu shiã weeji ì gu

Dii lata Baanaje Iliasu shì sagaa ututuũ ì shì'izo ì gu: Tá Iliasu Elishazo bò Giligali, àbi taa zεεma. Di Iliasu hε Elishan: Ñ gɔɔ guii! Baanaje ma jĩ Beteli. Di Elisha kε: Baanaje to n tozo mába kataa'mmaa. Tá àbi wada Beteli, di annabiã kungia tá bee Beteli à bò à nù à Elisha làla à kε: Ashe nn dɔ tá Baanaje bi n baanaje shia'mma kpãiaa? Ì jinshì'εε ì kε: Maa dɔ. À nateε! Di Iliasu hε Elishan: Ñ gɔɔ guii! Baanaje ma jĩ Yaliko. Ì jinshì'in ì kε: Baanaje to n tozo mába kataa'mmaa. Di à wε Yaliko. Annabiã kungia tá bee Yaliko à bò à nù à Elisha làla à kε: Ashe nn dɔ tá Baanaje bi n baanaje shia'mma kpãiaa? Ì jinshì'εε ì kε: Maa dɔ! À nateε! Di Iliasu kε'in: Ñ gɔɔ guii! Baanaje ma jĩ Yuudã. Ì jinshì'in ì kε: Baanaje to n tozo mába kataa'mmaa.

Di à dɔ kɔma, annabi gbãn kahwaa wokoi dɔ'àma. Tá gbace hwaa be gɔɔ Yuudã galla, di annabiã be gɔɔ sa. Di Iliasu ì tɔgo bò ì kukudà ì i wεzo, di i be gbii kɔji tun kawa dii ha kawa be, ì gɔ galla, di gbace hwaa be sàdama. Tá à sàda, Iliasu Elisha làla ì kε: Bu n yaaji mà kemii daaji Lakii ma shi'mma? Elisha jinshì'in ì kε: Ñ to n annabikegbada tá nn zo gɔmεε ha kù hwaa. Di Iliasu kε'in: Yáa be tá n zεε wiazo. Lokaci tá Lakii bi ma shia'mma, in n ma wà, ì gɔamii. In ntà ma wa kĩnda, mba taada. Tá àbi yáa be hea, àbi wada lee, di busu guda cenaje busu cenaazo à à kàta kɔma, di Iliasu wεe laaũ sagaa ututuũ. Tá Elisha wà, ì jĩndà ì kε: Baaba! Baaba! Nn Isra'ilaã jεεkebusugudaãn à busunaazo. Ìta ì wa mɔɔda, di ì ì tuhwaana

kàso ibe gbii hwaa. Tɔɔ tá bò Iliasuma ì sòò Elisha shì, di ì sɔdì ì wèè ì gɔ̀ Yuudā galla. Ì i wèè Iliasu tɔɔ bezo tá ibe kù ì kè: Baanaje Iliasu Lakii bee mai? Tá ì i wèè lee, di ì gbii kɔ̀ji tun kawa dii ha kawa be, di ì sàda.

Annabiā kungia tá bò Yaliko àbi waa, di à kè: Iliasu annabikegbada gɔ̀ Elishan. Di à nù à kɔ̀tà'izo à kùtɛɛ'in à kè: Wāa n zɔ̀kenaa, wa nɔ̀gɔ̀ni gbada gbān kahwaa wokoi zo. À wada n baanaje gudeji. Wàbata dɔ̀ in Baanaje Tāa ì shì ibe zù kasa kee miima ko gu'intɛɛna keeū. Di Elisha kè: Àba à jīa. À māmā'iji ha ì gɔ̀'in ũho di ì kè: À à jī. Di à gbān kahwaa wokoi be jī, à Iliasu gudè dii àa, àta bo'ímaa. Tá à sɔdì à shì, à Elisha tà Yaliko, di ì kè'èè: Matà he'èè àba weedaa?